



La Chasa Chalavaina fotografada l'on 1911, d'urant ün temp cha l'edifiz serviva sco chasa da paor e na sco albiorg.

fotografia: Christian Meisser/fototeca dal DRG

Ün hotel istoric e sias istorgettas

Ils 13 da november es la Chasa Chalavaina a Müstair gnüda undrada sco «Hotel istoric da l'on 2024» in Svizra. Tant illas comunicaziuns sco eir illas medias esa gnü fat allusiuin a fats istorics chi stan in colliaziun culla chasa istorica. Ma che es propi vaira, che brich e che es legenda? – La FMR s'ha missa in tschercha da l'istorgia da la Chasa Chalavaina.

La Chasa Chalavaina a Müstair es ün albiorg extraordinari. Ün hotel da taimpra istorica in müraglia veglia e cun stanzas da dschember chi scruoschan. Quai nu s'ha neir müda culs novs possessurs. D'urant passa 50 ons, fin l'on 2022, ha Jon Fasser manà insembel cun seis confamiliars l'hotel. Lura ha surtut la nouva Fundaziun Chasa Chalavaina l'hotel, üna fundaziun chi ha connex culla Clostra Son Jon, ün patrimoni mundial da l'Unesco.

La nouva fundaziun ha cumprà l'edifiz istoric e maina uossa güsta s'vessa l'hotel. Ils novs gestiunaris, lur pitschnas renovaziuns vi da la chasa e lur concept han persvas la mità da november ad üna giuria svizra. Quella ha undrà la Chasa Chalavaina cul titel «Hotel istoric da l'on 2024». Quella distincziun vain surdatta minch'on in üna collavaziun dad organisaziuns turisticas e da la chüra da monumaints in Svizra.

Manzunà la prüma jada dal 1254?

Illa comunicaziun dals 13 da november manzuna Hotellerie Suisse güsta plüs fats apparaintamaing istorics: «Mit der 1254 erstmals als Herberge erwähnten Chasa Chalavaina würdigt die Auszeichnung «Historisches Hotel des Jahres 2024» von Icomos Schweiz einen der ältesten Gasthöfe des Landes.» Ultra da quai fa l'organisaziun naziunala eir attent chi's tratta dad ün albiorg da pass e cha l'eroe grischun Benedict Fontana haja preparà quia si-as truppas per la battaglia da la Chalavaina. Quai tuna fich bain. Ma che es vaira? Es la Chasa Chalavaina propi documentada daspö l'on 1254 sco albiorg? Es ella propi adüna statta üna pensiun? Ed es Benedict Fontana propi stat in quista chasa?

Ün dals vegls albiorgs in Svizra

Da respunder definitivamaing a tuot quistas dumondas es difficil. Ma eir cun retscherchar in plüssas direcziuns, nu vain a la glüm ün documaint da l'on 1254 chi pudess attestar l'existenza da quist albiorg, da la chasa insomma o forsa d'ün oter albiorg a Müstair. Per exaimpel aint il «Cudesch da documaints grischun» (Bündner Urkundenbuch), la plü voluminosa collecziun dad acts grischuns, nu's chatta inguotta. Il gestiunari actual da l'hotel, Uli Veith, conceda sinceramaing sün dumonda da la FMR: «Schi, quella data e quella attestaziun es adüna gnüda manzunada invers nus. L'indicaziun ha fat la curella. E nus vain oramai eir fat adöver da quella.»

Ma cha eir seis agens sclerimaints, cun sustegn da perits da la perscrutaziun archeologica illa Clostra Son Jon, hajan muossà chi nun exista ün tal documaint. Perquai disch el hoz: «Nus nu fain plü activamaing reclama cun quella data dal 1254, nus discurren simplamaing dad ün dals plü vegls albiorgs da la Svizra.»

Istorgia cumplichada

Sainza dubi, la Chasa Chalavaina es veglia – però quant veglia? Ed es ella adüna statta ün albiorg? In quist connex po

la perscrutaziun «Die Bauernhäuser des Kantons Graubünden» da Christoph Simonett dar sclerimaint. I's tratta da retscherchas realisadas avant var 80 ons, ingio chi sun gnüdas inventarisadas e descrittas bleras chasas paucilas e stallas in Grischun. Quella collecziun conceda in connex culla Chasa Chalavaina: «Die Baugeschichte des sogenannten «Calvenhauses» in Müstair (...) ist recht kompliziert.» La descripciun muossa però cha l'edifiz es, sco bleras chasas in Grischun, ün veritabel potpurri da stils ed adövers tras ils temps. Probablamaing datescha la buna part da l'edifiz propi dal 13avel tschientiner, ingio chi'd existiva üna sort tuor d'abitare. Üna tala tuor as rechattaiva eir güsta daspera, i'l anteriur Hotel Tschieriv, sco cha l'anterior mader archeologic illa clostra da Müstair, Jürg Goll, declera sün dumonda da la FMR.

Plüs negozis i'l plan terrain

La perscrutaziun da chasas paucilas in Grischun nomna però amo ün oter aspet interessant da la Chasa Chalavaina. Illa part suotaint, sül plan terrain, as rechattaivan pitschens locals cun fanestras, quai chi d'eiran üna sort negozis («Kaufläden») chi pudessan avair servi per ün marchà da stoffa/tailla chi'd es

documentà per Müstair fingià i'l 13avel tschientiner. Quels negozis d'eiran locals annex ad üna chasa oriunda chi's vezza amo hoz davovart (sülla fotografia es quai il mür davo la lobgia, ingio chi'd es sù ün fresco).

Pür blerun plü tard, probablamaing i'l 17avel tschientiner s'haja fabricà sur ils tets da quellas butiettas e dasper la lobgia amo duos plans chi fuorman uossa (a schneistra) la fatschada principala cun sias fanestras a l'engiadinaisa.

L'eroe sülla lobgia

Culla lobgia aintra in acziun Benedict Fontana! In connex culla distincziun da Hotellerie Suisse ha scrit la «Bündner Zeitung» quists dis: «Der 21. Mai 1499, Benedikt Fontana tritt auf die Laube des Gasthauses und stimmt seine 6000 Kämpfer auf die Schlacht ein.» Insomma, il redacter scriva bain chi's tratta dad üna legenda, saviond cha cun eroes svizzers e grischuns nun esa da skerzar! Ma che es vaira vi da la legenda cun Fontana chi cloma giò da la lobgia? – Id es propi bain pussibel cha la Chasa Chalavaina (chi ha tschüf quel nom in sè pür i'l 20avel tschientiner) haja gnü da prüma davent üna sort lobgia. Sgür e tschert es cha'l ministerial Benedict Fontana, ün Surmiran da vaglia, ha propi cumbattü ed es mort illa battaglia

da Chalavaina. Quai ha cumprovà e descrit il schurnalist ed istoriker Claudio Willi in mincha detagl in sia disertaziun da l'on 1971. Schabain ch'el ha eir descrit co cha l'eroe Benedict Fontana es gnü «construi», sublimà e decorà illa litteratura ed istoriografia pür decennis e tschientiners plü tard, lösch davo la battaglia dal 1499. Quell'eroisaziun es da declarar cul patriottissem naziunal. Mincha pajais dovraiva seis eroes, ed il candidat ideal pel Grischun es stat Benedict Fontana chi s'ha laschà mazzacarar sül chomp da battaglia.

Cha quista persuna istorica vess però dad avair motivà il di avant la battaglia seis sudats giò da la lobgia da la Chasa Chalavaina es propi üna legenda chi nun es testifichada ninglur. La scena es però gnüda giovada precis uschè dal 1949 in ün gö liber scrit da Tista Murk, in occasion da 450 ons daspö la battaglia. Scha Benedict Fontana ha dimena propi vis la Chasa Chalavaina da daint es e restarà ün misteri.

Ün albiorg o na?

La pitschna descripciun da la Chasa Chalavaina in «Die Bauernhäuser des Kantons Graubünden» (intuorn il 1940) classifiescha l'edifiz in mincha cas sco «ehemaliger grosser Gasthof». I's parta dimena dal fat cha la chasa d'eira propi d'urant üna buna part da si'istorgia ün grond albiorg – ma apunta plü al mumaint da l'inventarisaziun scientifica, intuorn la mità dal 20avel tschientiner. In quels ons d'eira il stabilimaint üna «simpla» chasa da paor. Pür la famiglia Fasser ha darcheu transfuormà il chasamaint in üna pensiun cun restaurant.

Che es dimena il facit da la pitschna retschercha istorica in connex cul «Hotel istoric da l'on 2024»? – La Chasa Chalavaina ha sainza dubi vis ad ir e gnir bler daspö ch'ella sta sül Plaz Grond sper la clostra, dimena daspö var 700 ons. Id es üna chasa chargiada d'istorgia chi'd es oramai eir predestinada per gnir decorada cun amo daplü istorgettas, schabain ch'ella gnanca nu vess dabsögn da quai. La Chasa Chalavaina ha sgür merità la distincziun «Hotel istoric», eir sco impuls per l'avegnir. O culs peds dal gestiunari Uli Veith: «Nus vain propi grond plaschair da la distincziun. Ella motivescha da cuntinuar cun nossa via e da tegner chüra da quista chasa grondiusa.»

David Truttmann/fmr



Daspö il 2022 ha l'hotel da tradiziun sül Plaz Grond a Müstair novs gestiunaris.

fotografia: Jon Duschletta